

Atham woPoththuruc 2 Atham ie'ra ammakka oPoththuruc pokurrot

Lon lonothon

Pul pothothilettat poleccuo oPoththuruc pokurrinet ul ioccoke the lon loleccuo ka'ramacak engki akka kwinat itti kwaik pathokkuttat noma'ri motte. Kwokat pongothe itti kwakwarikiet ul ioccoke the lon loleccuo itti okin thikkoik appinappin ngkathar ikapirie Kapik noka. Ika'ramacak engki engki kwa'retto nakin akin okorronno okorronno opa'rine lon loKapik cik ana loleccuo ilakin thoccot naak ana napilingon ithikkot cik okin oleccuo. Kwokwarikiethekin itti okin thaccot kit noul iangkene ngkarra iokat cik aukko noppan toKapik. Ul enni iangkene ngkarra wokat cik akkupo ul ioccoke the lon loMiccie aikkoik thikkoik tholon ilokithak appinappin ana anekket lon nomikit itti oleccuo pakorronno okkaprttako. Anaruk oPoththuruc pi're itti oMiccie paik pakkaprttako ana Kapik kakitto a'rupu iaik inenni akopakket a'rek cik iie na lon ilokithak lella.

¹ Lon elli naun oCamaan oPoththuruc pul iporekinet oleccuo oMiccie ana pul pothothilettat poleccuo, Laine okkwion ithoccoke the lon loKapik nomikit nti ithiak thoKapik ana pul potho'ret thonnon oleccuo oMiccie ammakka thonnon. ² Athoporot thoKapik ana thomicco oka nanon attel nti ithina lon loKapik ana oleccuo Ili wonnon.

Thupokkot ilon loKapik

³ Pu'ran pung ipaik prek pethet ton a'rupu appik iaron ikkoik ngngin thikkoik itha Kapik kongothe ngkathar

ikaron thinak ngngin okkwi ipakkarot ton nthrik thung ana thoporot thung. ⁴ Ngkathar engki, kwethet ton thonekket lon cik thung thella pangken cik othakka itti aron oka thulukku aththut ana opa'rine lon lolon ilokithak lonocapu ncik appik ilakittoik. ⁵ Ana nti ilon elli nopo'rathan kiththik annarttot thoporot nothocokot tholon lon loKapik nomikit thon ana arttot thinaik nolon iloporot ⁶ ana arttot tho'rumo noka nothinaik ana arttot thocokot cikit ilon notho'rumo noka ana arttot thoporot nothocokot cikit ilon, ⁷ ana arttot thongarot ana thoporot nothikkoik ammakka Kapik kongothe. ⁸ Ana amma onon thonu lon elli nomikit mon ana alaik alarttakot nan, loppot lakorronno non annoka thinangka ana okkot lon loppot iloporot akka nthina Ili wonnon oIeccuo oMiccie. ⁹ Ana okkwi ipella lon elli kwi'rimathe ana kuret nan itti lon lung ilokithak loccikakinthok nci ma'rot. ¹⁰ Pangkingon noreko kannan annokene ka kon ana ul w'rek itti Kapik kakkarot non ana kocomot non itti annoka ul wung ana amma onon akkokkothe lon elli onon thakannurat cik. ¹¹ Ittina Kapik kanyine non kathat ikanni'riko ngngin ngili ngothupuththuput ngoIli ana pul potho'ret ponnon oIeccuo oMiccie.

Theret lon latham nul wothernte lon loKapik

¹² Ittina mpakwariket non lon elli appinappin ana antoka manna itti onon thina a'rupu wen ana a'rupu wen wupokkothe ilon ilaik icat ilanon thina inenni. ¹³ Loporot itti mpakorronno onon annokwarttikot cik inakka onon thaik ngkit thapat. ¹⁴ Akka mpina kicce itti mpaik pio accokkot ammakka Ili wonnon oIeccuo wokenerin, ¹⁵ ana ilen akka anorekine kannan othakka itti amma mpiot annokwarttikot a'rupu enni appik.

¹⁶ Onin thakorronno occot kit nerung ioku'rettat akka onin therenet non lon lopu'ran pothao thoIli oIeccuo

oMiccie, anaruk onin thimmat lon ngkit kin lothirik thung. ¹⁷ Onin thokat cik ceneket akka kwothiakinet cik ana thoporot noKapik ikririk akka po're pokat api're itti, "Ukul win enni ia mpopirat noka nan." ¹⁸ Onin ngka kin thocckothe po're pen apao ntothi'rot akka onin thokat inaththut noco'rong icupupure. ¹⁹ Ana manna lon loul wothernte lon loKapik lokenet ton kicce, ana onon thonu itti nthaccot kit nolon len ammakka oron ocot kit nok'ran ikacco i'rimak puccuk angorrot othakkakat ak'ran kocingki oppat nomikit mon. ²⁰ Onon thonu itti nthina nan itti lon lotheret atham nul wothernte lon loKapik nci ma'rot lakorronnoka lerettat nti ica copul pothernte lon loKapik. ²¹ Akka ul ierentet lon loKapik wakannoka itti were lon ammakka pul iponyi anaruk okin there lon noKapik ammakka Kanang ikupupure okenekin.

2

Ul iangkene ngkarra ana thokittoik then

¹ Ana ammakka ul wothernte lon loKapik ngkarra wokat cik ma'rot itho'rkik thoul menik cakuruk ul iangkene ngkarra wakaik itho'rkik thoul cakuruk. Okin thatheret lon ilanekot ul ic'rot okin thakannatheret lon lolli oleccuo ipo'rethekin ittina okin thanane ka ken thille aththaman. ² Ul woppot wamakot lon len ilokithak ana ittina nti ilon len opilingon there lon lokithak nolon iloporot ilaik icat. ³ Ul iangkene ngkarra wen wonu thiak tha'rupu won tulluk. Okin thamona nanon nerung ikakin thockothe. Anaruk Kapik konekentheth kin thattatta cik ncima'rot ana thok'rekin thiak tha'rikot kin thakannoppo cipit aththik. ⁴ Antokatha Kapik kakannipo thiak thou'rupa wothothilettat woKapik wung iokkothe lon ilokithak anaruk kwokiccet kin akworekat kin thothirin i'rimak ana i'rikikkot kin thanakin o'rikot ca'ri cothonce'ret lon cik. ⁵ Ana kannipo

thiak thoul woma'rot anaruk kwonanet ul wolon ilokithak ngike irik noththok ana ul wokkathiek mormor tulluk ana ul wen oNua pokat itho'rküt then ook ipakkakkarot ul itti waka woporot ella lon ilokithak cik. ⁶ Kapik kokittot ka'ran koCcothum ana koKamura akothikkiekat kin mucuk othakka itti aul iamakittot wolon ocimattako nti ilon len, ⁷ akokkiekat pul ipocco k'ran itti oLot cik ipokat pakannopira noka nolon ilokithak ngoul iella lon cik iloco'rotheik ⁸ Pul pen ipokat cik nomothok itho'rküt then pokat poporot kwokat akwocccikot lon ilokithak appinappin ana akokathacce ana lon len lokat alomiek nouce, ⁹ Kapik kina tat akka ako'ret ul wung nti ithiak io'rumot nolon lung anaruk okin thattattakot akin thaik akin o'rikot ca'ri cothonce'ret lon cik cothupuththuput. ¹⁰ Ana okin anganna ithaik thamakot lon ilokithak loka ken ana orakke ngili ngoKapik. Ana ul iangkene ngkarra wen wipot ka thoura ana okin thakannothiane okkwion cik thorothei'rot ithaik ithrik. ¹¹ Ana manna u'rupa wothothilettat woKapik wonu pu'ran prik noul iangkene ngkarra wen wonu pu'ran prik wakkot lon ilaul iangkene wen womma okkot wakannorukwet kin tokit koKapik. ¹² Anaruk ul enni wacungkwo lon ilakin thomma lon len. Okin thakkot lon ere a'rupu worua iakannokwarttikot cik iokwontat itti waccicokittat angutta nuthuk. ¹³ Okin then thattattakot llon ilokithak ilakin thokkothe ilokithak. Ilapiriekin noka itti okin thakkot lon ilokithak ngka ken icingki. Okin thothiet ul cik llon ilokithak ilakin thaik thakkot itho'rküt thon amma anno'rko thu'rit. ¹⁴ Kit ken koppathe lon ilokithak lulluk, okin thakwariccat ul wuluk iari ittat akin a'ro ngngin ana okin thakan-noco'ro nti ithokkot lon ilokithak okin thakkupot ul iomma lon kicce llon len. Mikit men mina okkot no're nuluk okin thaik ithattattako thoKapik. ¹⁵ Okin th'rat kathar ikoporot koKapik akin omakot kathar koPalaam

ukul woPaor iongothe lon lakucci ilanekarot ithokkot lon ilokithak.* ¹⁶ Anaruk kwoce'rettakathe nti ithokkot lon ilokithak, ca'ri icaKapik kethet nge'ringka pu'ran itti ngathiriethok cik aere mpo're popul iponyi pothernte lon loKapik. ¹⁷ Ul wen wikkoik ere tok irella ng'ri rit ana ere nuththe inakanang onyarittie ella kapik ikapo. Kapik kokuccentet kin ka'ran cik ciththothirin i'rīmak. ¹⁸ Okin there lon nthon nuthuk ana ipot ka thorua ngngin, anaruk lella thothiōt tit tholon iloporot. Okin thangkene lon ilokithak lotha'ro nul nuthuk ilakkaportto ul nti ilon loKapik ilaik icaricat iurnocokot lon loKapik. ¹⁹ Ana okin thanekenthet ul lon cik itti wakannoka iak anaruk akin thaiaik wolon ilokithak ilakin thaik thakkot akka pul paka piak polon ilalkothok. ²⁰ Ana amma okin thollothe lon ilokithak lonocapu ncik appik akin ina oIeccuo oMiccie ili wonnon ana wotho'ret thonnon mono akin appocokittat lon ilokithak mono angalkat kin ul iammakka wen waka ithokithak kannan thothoeken nathorokit. ²¹ Laakat loporot kannan nakin amma okin thatthomma lon iloco'rotheik loKapik nothina lon mono akin antopa'rineik ilettathekin. ²² Ilakin thokkothe lakene itti lon ilerettat nthokkwie lon kuru ncik laik icat itti thuk thapakkinthet a'rupu iaththuttetheik ana tutthuruk tapakkot ngar na topakkothe arappotho'roko ngar.

3

Ca'ri colli

¹ Pangkingon ithampongothe ka'ramacac engki kin ikathikkie ke'ra ana mpokurrinet non lon tit appik itti alokorronno non anokwarttikot cik thokwarttikot cik ithupupure. ² Lon lin itti onon thakwarikot lon loma'rot loul wothernte lon loKapik iupupure woma'rot ana lon

* 2:15 2.15 OPalaam pettathe akucci akwohattatta ul woKapik. Maun 22.4-35

loili loleccuo ila ul wothelettat wung werenet non.
³ Cittokit onon thonu itti onon thina itti ca'ri c'rek caik canthan cothoceken caul wakaik ionu ngangana nolon loKapik ana okin thammakot lon ilokithak ila ka ken kongothe tulluk. ⁴ Akin i're itti, "Kwi're itti kwonekkethe lon cik itti kwakkaprttako ana kwaren? ONgappan thonnongon, ul woma'rot thillet ana lon lo'rungkwathe ammakka lokat cik nci ammakka cik coku'rettat ncik." ⁵ Okin thella kit kolon loKapik itti kokkothe tothi'rot ana capu cokkattathe noi'ri ana ng'ri, ⁶ Ana ngng'ri ngen ul woma'rot noca'ri coNua willet ngngin, ⁷ ilon len loKapik ilokkothe tothi'rot ana capu icaik inenni ana ilen ilongwot ul ingike irik noca'ri coNua ilen akka onekkethe capu cik itti cathoke'rtta. Capu ana tothi'rot tho'rumakinet ca'ri cothonce'ret lon cik coul i'rat lon loKapik athokittako nan.

⁸ Anaruk pangkingon nokorronno ure nolon elli akka ca'ri culukku caka noKapik ere luput athar attul ana luput athar attul laka ere ca'ri culukku. ⁹ Ili wannoka wiruk llon ilonekkettatheik ammakka ul w'rek i're. Kaik kaccokinthe non cikii ana ka kakannangkot itti opilin pattattako anaruk kwongothe itti onon thacottako nti ilon ilokithak appik.

¹⁰ Anaruk ca'ri coKapik canthan ere pul pothu'ran. Tothi'rot thinta cik nthule'rak ana a'rupu appik wako'ro nthik ana capu ana ngre ngaik tit ngape'riccakot cik ¹¹ Ana amma a'rupu appik wellaik ittina, onon thaka taththa? Lakannoka itti onon thamakot kathar ikoporori ikupupure koKapiki? Ana occokot lon loKapik nomikit papenangi? ¹² Ana anon thaik anoco'rine ca'ri coili Kapik icanthan, onokuccekinthe cik acanthan accokkot. Ca'ri cen cana thokittoik ana tothi'rot tako'ro ana a'rupu appik wathakka ng'ri llü. ¹³ Anaruk oron thonu itti oron tha'rikot lon lung ila kwonekketheik tothi'rot irie ana

capu icie ana tuan tung iraik icat nalon oka lonco'rotheik appik.

¹⁴ Pangkingon inakka anno'rikot cik nopo'ra than cannan annoka thupupure ana annoka iku'ri annoKapik.

¹⁵ Ina nan itti ili Kapik waccokinthet ton cikit akka wongothe ul itti wa'rettat. Ana cakuruk ammakka opang ponnon oPoluc pokurrinet non nthinaik nti ica itha Kapik kethok. ¹⁶ Ammakka laik ia'ramacac wung appik iakkwokurrot weret lon len anaruk a'ramacac wung wonat lo'rek tit lonthomat loma inako ilaul iommaik ana iangkene ngkarra ongekene ngkathar moloko ammakka okin thongothe ana ilakin okkot nonatham n'rek akin ongwo ka ken.

¹⁷ Ittina pangkingon, inakka onon thina elli ila Mpi'rethenon papenang ono'rumoik othakka itti anon okorronno opa'rettaik ilon loul wolon ilokithak ana akka annella ka'ran cik ikoporot koKapik. ¹⁸ Anaruk narttot nothoporot thoKapik ana anarttot nothina lon lotho'rettat thoilli oleccuo oMiccie. Athirik oka thung inenni ana thupuththuput. Amin.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243faegee